

Melayu, Islam teras nasionalisme bangsa Malaysia



Pensyarah Kanan
Pusat Pengajian
Bahasa, Tamadun
dan Falsafah,
Universiti Utara
Malaysia (UUM)

Oleh Mohd Ammyrul Ashraf Sairan
bhrencana@bh.com.my

Masyarakat pada awalnya tidak memahami konsep negara bangsa. Sejarah pembentukan negara bangsa berlaku akibat pengaruh nasionalisme giat berlaku sekitar abad ke-18 di Eropah.

Istilah nasionalisme dikatakan berasal daripada kata 'nation' (bangsa) membawa makna suatu binaan sosial dan nasionalisme pula diertikan sebagai projek politik.

Sebagai suatu konsep dianggap politik, nasionalisme tercetus ketika Revolusi Amerika 1776 dan Revolusi Perancis 1789. Ketika itu ia bersifat Ger-

akan Nasionalisme atas kesedaran rakyat untuk melepaskan diri daripada cengkaman kerajaan.

Di sisi lain, nasionalisme muncul sebagai kesedaran bagi menyatukan wilayah berpecah seperti berlaku di Itali pada 1848 dan Jerman atau Prusia pada 1971.

Semangat nasionalisme ini kemudian tersebar meluas dan mendorong negara jajahan memperjuangkan kemerdekaan. Pertumbuhan nasionalisme di negara Asia-Afrika umumnya didorong perasaan antipenjajah.

Akhirnya menjelang abad ke-19, pengaruh nasionalisme mula menjalar ke Turki, Mesir dan beberapa negara Asia Barat. Ia mula terdengar di Asia Tenggara dan ketika itu ramai golongan elit tempatan Tanah Melayu menuntut ilmu di Asia Barat dan Eropah.

Di sinilah, orang Muslim Tanah Melayu berkenalan dengan gerakan nasionalisme. Secara jelas, nasionalisme menjadi darah daging dalam diri umat Islam Malaysia, terutama bagi berfaha-

man Ahli Sunnah wal Jamaah (ASWJ).

Dalam pandangan sarjana ASWJ, cinta kepada tanah air itu penting dan menjadi sebahagian daripada prinsip perjuangan. Pemikir Islam Mesir, Hasan al-Banna menyatakan, 'jika nasionalisme mereka maksud adalah keharusan berjuang membebaskan tanah air daripada penjajah, berjuang menuntut kemerdekaan, serta menanamkan makna kehormatan dan kebebasan jiwa rakyat, maka kami bersama mereka dalam hal ini'.

Di sinilah, kita perlu memantapkan kefahaman mengenai falsafah nasionalisme. Hal ini disebabkan nasionalisme asas kepada perpaduan Melayu.

Memandangkan Melayu adalah kaum majoriti di negara ini, maka menjadi tanggungjawab besar kaum ini menghalai tujuan dasar negara. Sebahagian besar orang Melayu begitu dominan dalam parti politik.

Oleh hal demikian, mereka menjadi nadi utama dalam sistem pemerintahan negara dan sebahagiannya lagi bersifat haluan kiri atau pembangkang menjadi fungsi semak dan imbang agenda mahu dilaksanakan kerajaan.

Manifestasi rasa, keinsafan bangsa Melayu

Sungguhpun begitu, wujud sebahagian masyarakat beranggapan nasionalisme adalah fahaman memiliki elemen sekularisme, yakni suatu pemikiran bersifat pengasingan antara agama dan elemen kehidupan.

Justeru, timbul persoalan, adakah benar nasionalisme menjadi sandaran kepada teras perpaduan Melayu dan Malaysia lahir daripada sekularisme?

Dalam hal ini, pemikir negara menyifatkan nasionalisme Melayu berbeza dengan nasionalisme Barat. Nasionalisme Melayu adalah manifestasi rasa dan keinsafan bangsa Melayu.

Kefahaman ini wujud disebabkan ditindas dan diperas golongan penjajah. Dr Burhanuddin al-Helmy pula mentafsirkan ia sebagai 'Kebangsaan Melayu', memelihara dan menghidupkan hak kebangsaan Melayu.

Maka, dapat disimpulkan konsep nasionalisme Barat tidak jauh berbeza dengan konsep nasionalisme Melayu. Namun, bagaimana dengan pandangan Islam terhadap nasionalisme.

Dalam artikel *Islam and Nationalism: A Contemporary View*, ia menghuraikan tiga istilah Arab biasa digunakan bagi merujuk kepada konsep nasionalisme iaitu 'asabiyah', 'qawmiyah' dan 'wathaniyah'.

Ibnu Khaldun menjelaskan asabiyah sebagai kesatuan sosial diperlukan bagi kelangsungan kehidupan sesuatu bangsa. Asabiyah akan berkembang menjadi qawmiyah, ketika wujudnya semangat kebangsaan memuncak.

Kemudian, dalam konsep wathaniyah, sentimen asabiyah ini akan memuncak hingga lahir suatu bentuk negara bangsa. Sebagai contoh kewujudan negara seperti Palestin, India dan Pakistan.

Selain itu, orang Islam sudah pasti tidak asing dengan sebuah hadis bermaksud, 'mencintai tanah air itu sebahagian daripada iman'. Ini menunjukkan Islam tidak menentang perasaan nasionalisme atau kebangsaan dalam diri.

Sehubungan itu, nasionalisme menjadi dasar dan teras perpaduan Melayu adalah dasar boleh diterima Islam, selagi dasar dan perpaduan ini tidak dinafikan hak asasi umat Islam lain dan juga kaum lain.

Kekuatan umat Islam dan Melayu dalam negara seharusnya menjadi teladan kepada bangsa lain di dunia dalam melaksanakan sistem pemerintahan adil dan saksama.